

12 अप्रैल, सोमवार दिया संपूर्ण गड़चिरोली जिला बंद तुन सफल क्वायकड़!!

जनता ना जनवादी क्रांति साटी तम्मा जीवांग पोहता जनयोद्धा कॉमरेड्स भास्कर (पवन, ऋषि हिचामी), सुखदेव (राजू नैतम), सुजाता (कमला आत्रम), अस्मिता (योगिता पद्दा), अमर (मुया उंडाम) किन क्रांतिकारी जोहार!

जीवाता क्रांतिकारी जनता,

मावा गड़चिरोली जिला ता लडाई इतिहास लोपा दिनांक मार्च 29 उंदि महान बलिदान दिवसता रूपते दर्ज आता. गड़चिरोली जिला कोर्ची तहसील कोब्रामेंडा जंगलते मुव्वूर सी-60 खुंकार कमांडोतोरिन खत्म कीसि कई कमांडोज किन घायल कीसि मावा पीएलजीए ता जांबाज गुरिल्लालोर जिलाता लडाई इतिहास लोपा उंदि पूना अध्याय तुन जोडा कीतोर. अद लडाई लोपा मावा जीवाता कामरेड्स, गड़चिरोली, बस्तरता भूमि ता मरहकु मयस्कु आदिवासी जनताना लाडले पिल्लांग पेकोर पांच जन रणभूमि लोपा हिम्मत आणि पराक्रमता परिचय हीसोरे तम्मा जीवांग किन बलिदान कीतोर. तम्मा नेतुर तुन पोहची तिप्पागढ़ मेटटा भूमिते संघर्षता इतिहास तुन लिखा कीता जनता ना, पार्टीता प्रिय नेता कॉमरेड भास्कर, ओसो सुखदेव, सुजाता, अस्मिता, अमर किन लाल लाल जोहार वेहताकाड. ओरा लडाई ता आदर्श किन हर हमेशा साटी तेहची पोयकोम इंजोरे, युवा पीडी तुक हेवसी क्वायकोम इंजोरे किरिया क्वायकड़। ओरा साहसिक बलिदानकुना सम्मानते, ओर किन क्रांतिकारी आदरांजली अर्पित कियला 12 अप्रैल 2021 (सोमवार) संपूर्ण गड़चिरोली जिलाते बंद तुन पालन क्वायकड़। मावा क्रांतिकारी बहदूर योद्धालोरा क्रांतिकारी इतिहास तुन पुंदाकाल।

कॉमरेड भास्कर कसनसूर एरियाता पोटावी जेवेली नाटे हिचामीरा लोते 43 सालकुना मुन्ने पुटतोर. तम्मा यायो मानो बाबो रावजी ओनकु ऋषि इंजी पोरोय तास्तोर. कॉमरेड ऋषि उडलस्के प्राथमिक साळा करियसोरे लोता कास्ताकारी काम वेने कीसोरे नाटेना क्रांतिकारी जन संगठनता कार्यकर्ता रूपते काम कीतोर. मेहनतकश मूलवासी परिवारते पुटता ऋषि जन मिलिशिया लोपा शामिल आसी क्रांतिकारी कबस्कुना लोपा वेला गिर्दते शामिल आंदूर. 1998 ते कॉमरेड ऋषि पूर्णकालीन कार्यकर्ता रूपते भारतता कम्युनिस्ट पार्टी (माओवादी) ते भर्ती आतोर. अगडल 2021 मार्च 29 हेवनल ओना क्रांतिकारी जीवन प्रस्थान वेला आदर्शपूर्ण मंता कॉमरेड ऋषि पार्टी लोपा भर्ती आता पया भास्कर पोरोय तास्तोर. शुरूते गैक तम्मा कसनसूर एरिया ता गुरिल्ला दस्ता लोपा काम कीता भास्करना योग्यतांग किन हूडसी पार्टी इद समयता डीके स्पेशल जोनल कमेटी सदस्य ना सुरक्षा गार्ड जिम्मेदारीते बदली कीता. अगा दो सालकु काम कीता पया कामरेड भास्कर गड़चिरोली डिविजन गटटा एरिया ता दल कमांडर जिम्मेदारी पोयसी काम कीतोर. हर काम लोपा तन्ना क्षमता तुन परिचय कीसोरे विकास आसोर मत्ता कामरेड भास्कर किन 2006 ता डिविजन अधिवेशन लोपा डिविजनल कमेटी तुक चुना कीतोर.

2006 तल 2017 हेवनल कामरेड भास्कर दक्षिण गड़चिरोली डिविजन ते काम कीतोर. डिविजन ते सिरोंचा तल गट्टा-भामरागढ़ हेवनल कामरेड भास्कर पुनवा नार, मेट्टा, कोहडा, डोड्डा, ईलका, जंगल, जनता हिलोर. डिविजनता कदम-दर-कदम ओनकु सुपरिचित भूमि आंदू. दक्षिण गड़चिरोली ते काम कीयना समयतेने 2009 ते पार्टी कॉमरेड भास्कर किन रीजनल स्तर तेके पदोन्नती कीता. 2013 तल 2015 हेवनल कामरेड भास्कर एकीकृत कमांड सदस्य रूपते काम कीसोरे दक्षिण ओसो उत्तर गड़चिरोली डिविजनकुना आंदोलनकुन सृष्ट कियना लोपा वेला योगदान कीतोर. 2005 ते कामरेड रामको नोरोटी ना संगे मर्मी आतोर. कामरेड रामको नोरोटी 2019 अप्रैल 19 तुक झूठी मुठभेड ते शहीद आता.

कामरेड भास्कर 2017 मार्च तल 2021 मार्च हेवनल उत्तर गड़चिरोली ते डिविजनल कमेटी सचिव रूपते पार्टी तुक नेतृत्व कीतोर. 2015 अक्टोबर ते सफलतापूर्वक संपन्न आता दण्डकारण्य ता पार्टी दूसरी प्लानमते कामरेड भास्कर किन विशेष जोनल कमेटी तुक वैकल्पिक सदस्य रूपते चुना कीतोर. पया 2018 अगस्त ते पूर्णकालीन कमेटी सदस्य रूपते एततोर. कॉ. भास्कर तन्ना 22 सालकुना क्रांतिकारी पिस्वल लोपा त्वरित गतिते विकास आसोरे साधारण पार्टी सदस्य तल तन्ना क्रांतिकारी जिंदगीता प्रस्थान तुन शुरू कीसि स्पेशल जोनल कमेटी सदस्य हेवनल विकास आतोर. गड़चिरोली भूमिते शोषक शासक वर्गतोरा संगे लडेमासोरे जिलातेके तन्ना जीवा तुन पोहता पहली नेतल मावा भास्कर आंदूर.

कॉमरेड भास्कर ओर दर्जनों कैडर किन राजनीतिक, सैनिक क्षेत्रकुने सक्षम योद्धालोरा रूपते तैयार कीतोर इंजी मार्च 29 ता घटना बराबर साबित कीता. आखरी संग्राम लोपा वेने सी-60 तोरकु सबक सीखा कीसोरे पीएलजीए जिंदाबाद इंजोरे जनयोद्धालोरा हिम्मत और शौर्य तुन परिचय कीसोरे माओवादी पार्टी ता अमर योद्धा बनेमातोर. कॉमरेड भास्करना क्रांतिकारी जन सेवांगकिन शत-शत प्रणम कीसोरे जन योद्धालोरकु हामुर हिले इंजोरे मेट्टांग गुडुंजनल सीता क्वायकाड।

कॉमरेड सुखदेव : तिप्पागढ़ एरिया लोपा मरकानार नाटे नायतामीरा लोन पुटतोर. तम्मा यायो-बाबो राजू पोरोय तास्तोर. कामरेड राजू 10वी हेवनल स्कूल करियतोर. राजू स्कूल पढाई मारता पया 2012 ते पीएलजीए ते भर्ती आतोर. क्रांतिकारी आंदोलन लोपा भर्ती आता पया सुखदेव पोरोय वाटतोर. ओना पढाई, योग्यतांग हूडसी पार्टी ओनकिन पार्टी ते गुरुजी जिम्मेदारी हीसि मत्ता.

कामरेड सुखदेव गुरूजी जिम्मेदारीते मतस्केने पार्टी आल्सीस मंजी ओनकु मुन्ने चातगांव एरियाते पया सैनिक क्षेत्रतेके बदली कीसि प्लाटुन ते नियुक्त कीता. कामरेड सुखदेवना सांगठनिक, सैनिक क्षमतांग किन हूडसी 2018 ते ओनु एरिया कमेटी तुक पदोन्नती कीता. 2019 आखरी ते उत्तर गडचिरोली डिवीजनतल लगभग दो दर्जन गुरिल्लालोर, कमांडरलोर आंदोलन तल पेरके गुचीसि पुलिस मुन्ने आत्मसमर्पण कीतस्के कामरेड सुखदेव वेला दृढताते मंजी तन्ना जिम्मेदारींग निभा कीतोर. गुरिल्लालोर तम्मा क्रांतिकारी पिस्वल लोपा वायना अडचन किन हूडसी वेरियतेके जन क्रांति बस्केने सफल आयो इंजोरे कामरेड सुखदेव आखरी हेवनल लडेमासोरे साबित कीतोर.

कामरेड सुजाता : कामरेड सुजाता अहेरी एरियाता कपेवंचा नाटे आत्रमीरा लोन पुटता. लोता पोरय कमला आंदू. कामरेड कमला हूडलस्के पढेमातद हिले. मावा मूलवासी आदिवासी परम्परा हिसाबते बेरस्ता पिल्ला आंदू. तम्मा-यायो बाबो कमला ना मर्मि नाटेना कामरेड ईसुना संगे कीतोर. ओर किन वरोर मर पुटतोर. कामरेड ईसू उडलस्केटल क्रांतिकारी काम लोपा शामिल आसोरे 2004 ते भर्ती आतोर. तन्ना जीवन साथी ना प्रोत्साहन ते कामरेड कमला वेने पीएलजीए लोपा तन्ना 25 सालकुना उम्र ते 2004 ते भर्ती आता.

कामरेड कमला आंदोलन लोपा सुजाता पोरय तासिसी मुन्ने पेरिमिली एरियाते काम कीता. पया कामरेड तन्ना जीवन साथी संगे टिप्पागढ एरिया तुक बदली आता. अगा अलग-अलग जिम्मेदारींग पोयसी काम कीता. कामरेड सुजाता स्कूल करियसोरे जनता तुक राजनीतिक वेहचोरे पुलिस दमन लोपा वेने बचोन बीमारी मतेकाई पेरके गुचवा लेवा आखरी एवनल क्रांतिकारी दृढता ते काम कीता योद्धा सुजाता आंदू.

कामरेड अस्मिता पद्दा : तिप्पागढ एरियाता गुरेकस्सा नाटे पुटता. अस्मिता ना यायो-बाबो तम्मा मयड तुक योगिता इंजोरे पोरय तास्तोर. यायो बाबो पेशावर क्रांतिकारी लोरा जिम्मेदारी पोयसी आंदोलन ते भर्ती आता पया कामरेड योगितना मामालोर 11वी एवनल स्कूल पढाई करहतोर. कामरेड योगिता 11वी परिक्षा उदवाये तन्ना यायो-बाबोना आदर्श कुन पोयसी 2015 ते पीएलजीए ते भर्ती आता.

कामरेड योगिता क्रांतिकारी आंदोलन लोपा शामिल आता पया अस्मिता पोरय तास्ता. अस्मिता ना पढाई, लोता नेपध्य, नम्रता तुन हूडसी पार्टी कामरेड भास्करना सुरक्षा गार्ड जिम्मेदारीते तास्ता. कामरेड अस्मिता आखरी हेवनल कामरेड भास्कर किन वेला जीवा कीसि हूडसोरे तन्ना जिम्मेदारी तुन बेस निभा कीता. कामरेड भास्कर लगातार मलेरिया एडकी ते तिप्पल आंदूर. मति कामरेड अस्मिता पल-पल ओना स्वास्थ्य आणि सुरक्षा तुन हूडिंदू. आखरी समय ते वेने कामरेड भास्कर शहीद आता पया अस्मिता ओना ए.के तुपाई पोयसी प्रतिरोध कीसोरे तन्ना जीवा तुन क्रांतिकारी संग्राम लोपा कमांडरना संगे-संगे बलिदान कीता.

कामरेड अमर : अमर दक्षिण बस्तर ता पामेड एरियाता बिकुडम नाटे उंडामीरा लोन पुटतोर. यायो-बाबो मूया इंजोरे पोरय तास्तोर. कामरेड मूया उडलस्केटले क्रांतिकारी जन आंदोलन लोपाने पुटसी बेरस्तोर. आदिवासी सामंती फासीवादी वर्ग मुन्ने मंजी ताकी कीता सलवा जुडूम तल इंजेटा प्रतिक्रांतिकारी समाधान हमला हेवनल दक्षिण बस्तरता नार-नार जन युद्धता किस लोपा पोत्तामंता. अद लडाई ता किसतल विकास आसि मत्ता मूया 2014 ते पीएलजीए ते भर्ती आतोर.

पीएलजीए ते भर्ती आता पया कामरेड मूया किन पार्टी गडचिरोली बदली कीता. गडचिरोली वासी इगा नेतृत्व आणि कैंडरना विश्वास तुन जीकतोर. ओना सैनिक क्षमतांग हूडता पार्टी ओनु एसजेडसी मेबर किन सुरक्षा गार्डते तास्तोर. पया फील्डता जरूरत किन हूडसी डीवीसी कसनसूर दलतेके बदली कीता. अद जिम्मेदारी ते मत्ता कामरेड अमर 29 मार्चता हमलाते वेने साहसिक गुरिल्ला, भूमिका तुन निभा कीतोर. 2 जन सी-60 कमांडोलोरिन हवकीसि पुलिस तोरा घेराव तुन ब्रेक कीसि तन्ना साथी गुरिल्लालोरिन घेराव तल पेसी कीसि तन तन्ना जीवा तुन बलिदान कीतोर.

मावा जीवाता जनता!

मावा गडचिरोली, बस्तर भूमता मर-मयस्कु मनवा जनता ना साटी लडेमासी तम्मा जीवांग बलिदान कीतोर. ओर ब्राह्मणीय हिन्दुत्व फासीवादी विरोधते आदिवासी बचाव साटी, जल-जंगल-जमीन आणि सत्ता साटी लडेमातोर. ओरा हरी लडाई ता हरी अद हरदे मनल ताकना. ओरा आदर्शपूर्ण जिदंगी तुन सीता कीसोरे संपूर्ण गडचिरोली जिलाबंद मानेमायना इंजोरे मावा ब्यूरो बगिलतल विनती कीसोरे मंतोम. सरकार, पुलिस बचोक समाधान हमलांग ताकी कीतेकाई, प्रहार अभियानकु ताकी कीतेकाई जनयुद्ध तुक हार हिले. जनयोद्धालोरकु हामुर हिले इंजोरे विश्व क्रांतिकारी परम्परा तुन मुन्ने ओयकड!

❖ अमर शहीदलोरा स्मृतिते अप्रैल 12 तुक 2 मिनट मौनधारन कीसि बंद सफल कीयना!

❖ कोरोना सतर्कता तुन पालन कीसोरे सी-60 कमांडोलोरा प्रतिक्रांतिकारी कार्रवाईंग कुन खंडन कीयना!

31-3-2021

विनती कीसोरे
पश्चिम सबजोनल ब्यूरो, गडचिरोली
दण्डकारण्य, भा.क.पा (माओवादी)